



**Sc'i sun morc con Crist, viarunse ince con el.** (San Paul)

La ploania d'La Pli á tut comié da **Maria Kehrer ved. Vollmann** (+ 04.04.2017, 80 agn) y ti fej les condolianzas ai familiars por la mort dla oma, lâ y so. Che le Signur toli sö söa anima te söa ciasa!

- **Consei de Formaziun:** „**Ma ci che an conesc, á ince na valüta**“. Sot a cösc moto organiseia le Consei de Formaziun la secunda sera sora **i libri de calogna** d' La Pli. En lönesc, ai 10 d'aorí ales 20:00, cuntará Jep Agreiter de Brach sora l'archif. An ará la poscibilité da ciaré ete tai libri y fá domandes.
- **Sorvidús:** por en Pasca periunse endô der bel do val' üs por nüsc ministranc y nostes ministrantes. Der bel iolan!
- **Mostra en segno de to amur:** la “Südtiroler Krebshilfe” met da jí en Pasca do la gran messa l'aziun „**Na resa por la vita - daidé por daidé**“. Por Osc segno de solidarité Ves dijunse belo danfora bel iolan y Ves aodun na Bona Pasca!



## enformaziuns y termins

**Velia da Pasca:** le Grup Decanal y i Grups SKJ dai Jogn dla Val Badia envieia düc ala velia en la Jöbia Santa, ai 13 d'aorí ales 22:45 tla dljia da Oies. Al sará na velia de adoraziun y de meditaziun olache al ven perié, cianté y medité tal chit.

**KVW Seniorencub:** en dedemesaledema ai 12 d'aorí peiun ia ales 13:30 cole bus (Cone) por jí a St. Sigmund a lí y cianté (Cor dai Seniore) les Staziuns tla Stöckkirche - Maria Adolorada. Dedô picia marena. Se prenoté pa Lidia, ☎ 339 7899107.

**Sorvisc ai Jogn:** Chireste ciamó n laur por l'iste? Este interessé da cuché ete tal monn dal laur? Aste danter 13 y 19 agn? A ci aspeteste pa spo? Scriete ete al proiet JABA 2017! Les iscriziuns pó gní fates dai 15 má ennant tal ofize dal SaJ (dal lönesc ala jöbia, 08:00 - 12:00 y 13:00 - 17:00). Enformaziuns, ☎ 0474 523070.

**Envit:** la Uniun Ladins Val Badia, en colauraziun cun l'Istitut Ladin, envieia ala matinee en Lönesc de Pasca a San Martin sön plaza / tal salf dl Istitut Ladin, co met man ales 10:30 con la presentaziun dal liber "Cianties de dljia y rimes incëria - 200 composiziuns religiozes y profanes" de Tone Gasser; lapró cianta le Cor dai Mituns y le Cor de Dljia da San Martin. Dedô buffet de liagnes blances, musiga dal vi con "Nik Lee and the Marcos" - cüfada de üs abelis con dic ladins - marcé dai libri.

**Zenter Families Mareo:** le ZFM organiseia n curs de pilates y tabata con Marta Willeit, dai 20 d'aorí ai 22 de ma (10 iadi), lönesc y jöbia ales 20:15 te palestra a Al Plan. Cost 50,00 € por i soci dal ZFM, 60,00 € por i atri. Info y prenotaziuns anter i 17 d'aorí pa Marta, ☎ 339 7384558.

<b>Döt le bun a:</b>	Paola Maria Palfrader	10.04.1933
	Maria Anna Ellecosta, <i>Trens</i>	12.04.1936
	Elena Maria Daverda ved. Ellecosta	14.04.1937
	y a düc chi co á santennom y compless i agn cöst'edema	

**Impressum:** Ploania d'La Pli; redaziun Franz Rigo y Edith Willeit  
**Comunicaziuns** cina al dedemesaledema sera a Franz Rigo: ☎ 0474 500978 o ✉ ploania@gmx.net  
**Download plata:** www.unitepastorala.org



## Le Re dla pêsc

☞ **Mt 21, 1–11 | Is 50, 4–7 | Fil 2, 6–11 | Mt 26, 14 – 27, 66**

### Dal Vangelo do San Mateo:

<sup>1</sup>Canche Gejú ea roé con sü acompagnadus nia dalunc da lerúsalem a Bétfaghe söla Munt dal Orí, ál orcé dui discepui danfora <sup>2</sup>y ti á dit: Jide tal paisc co é dan os; danló ciafareise na müscia tacada y n polerin lapró. Destachédela, y condüjédemla! <sup>3</sup>Y sce zacai ess da ves dí val', spo respognede: Le Signur l'adora, al la lascia defata condü derevers. <sup>4</sup>Cösc é sozedü por ch'al s'adempliss ci co é gnü dit tres le profet: <sup>5</sup>Dijedi ala fia de Sionn: Ciara, to re ven da te. Al ô la pêsc, y al raita sön na müscia y n polerin, söl polerin de n tier da port. <sup>6</sup>l discepui é jüs y á fat ci che le Signur ti â dé sö. <sup>7</sup>Ái á condüt la müscia y le polerin, á motü sü guanc sön chisc y spo s'ál sonté lassora. <sup>8</sup>Trepa jont destenea sü guanc ia por strada, d'atri taiâ jö rames dai lens y les sternea ia por tru. <sup>9</sup>La jont, co jea danfora y co ti gnea do, scraia: Osanna al Fi de Davíde! Benedí sides el, co ven tal ennom dal Signur. Osanna tal plü alt dal cil! <sup>10</sup>Canch'al ea jü ete te lerúsalem, s'á döta la ciüté emozioné y an damaná: Che é pa cösc? <sup>11</sup>La jont dijea: Cösc é le profet, Gejú da Názaret tla Galilea.

### I ponsun do

*I se damanun val iade co ch'an pó tigní sö le mal por che le ben pói se slarié fora. Sc'i ti ciarun al ingres de Gejú a Ierusalem ciapunse na resposta a cösta domanda: al ne raita nia a ciaval, mo sön en müsc; cösc ea por la jont da laota en segn che al portâ salveza con umilté y zonza violenza. Les rames de belorí benedides ch'i portun dô messa a ciasa se deida recordé Gejú Crist, le Re dla pêsc, y la forza dla benedisciun ch'al s'á porté.*

### I periun

*Gran Dio, te cöst'Edema Santa festejunse le momont culminant dal ann liturgich. Láscesse diventé chíc por ponsé dô y renforzé nosta uniun con Crist, co é jü danfora le tru tla mort y dla ressureziun y vir y regneia con te t'eternité.*

*Wilhelm Egger "Sonntagsbibel"*



Letöres dla **GRAN FESTA DE PASCA:**

**St.Ap 10, 34a.37–43 | Col 3, 1–4 | 1 Cor 5, 6b–8 | Jan 20, 1–18**

**Edema liturgica dai 09.04. ai 16.04.2017**

<b>DOM 09.</b>	<b>DOMEGNA DAL ORÍ FESTA DAL INGRES DE GEJÚ A IERÚSALEM</b>	Waltraud, Konrad
<b>► 08:15</b>	benedisciun dal belorí jö dal paiun, prozesciun te dlijia, <b>gran messa</b> por döta la ploania con la Pasciun do San Mateo	
<b>Lön 10.</b>	<i>d'edema santa</i>   Engelbert, Hulda, Magdalena G. <b>de d'oraziun personala y te familia</b>	
<b>Ded 11.</b>	<i>d'edema santa</i>   Gemma Galgani, Stanislaus	
<b>► 07:45</b>	<b>s.m.</b> dai scolari por +ti Anna y Leopold Erhard y + Jep Konrater <b>s.m.</b> por +ti Jep y Rosa Ellecosta, Lüchesc	
<b>Dem 12.</b>	<i>d'edema santa</i>   Zeno, Herta	
<b>► 19:30</b>	<b>funziun con les Staziuns</b> con l'Uniun dai Ei	
<b>Jöb 13.</b>	<b>JÖBIA SANTA</b>   Martin I., Ida	
<b>19:30</b>	<b>s.m. dl'Ultima Cena</b> de ringraziament por l'Eucaristia y le Sazerdoze, <b>s.m.</b> por +ti prei y <b>s.m.</b> por + Emma Frontull ved. Ellecosta ♪ <i>Johann Kircher, "St. Canisius-Messe"</i> <b>adoraziun dal SS. Sacramont</b> tla „Fossa Santa“, velia con la Joneza y poscibilité d'adoraziun personala y chita cina les 22:00	
<b>Ven 14.</b>	<b>VENDRES SANC</b>   Valerian, Lidwina, Erna   <b>jain y astinonza dla cern</b>	
<b>15:00</b>	<b>liturgia dal Vendres Sanc</b> con la Pasciun do San Jan, veneraziun dla Santa Crusc, funziun dla Comegnun → <b>offerta de Carsema</b>	
<b>Sab 15.</b>	<b>SABEDA SANTA</b>   Hunna, Damian	
<b>20:00</b>	<b>funziuns dla Net de Pasca:</b> benedisciun dal fű y dal cere, “Exultet”, liturgia dla Parora, <b>s.m.</b> ciantada de ringraziament y por la pesc, benedisciun dal'ega y renovamont dles empormetüdes dal Bato ♪ <i>Karl Nussbaumer, "Festmesse"</i>	
<b>DOM 16.</b>	<b>GRAN FESTA DE PASCA</b>   Bernardette Soubirous, Benedikt Josef	
<b>08:30</b>	salüde ala festa, “Vidi Aquam”, <b>gran messa</b> ciantada solena por döta la ploania, benedisciun dal signé ♪ <i>Anton Faist, "Dritte Messe"</i>	
<b>14:00</b>	<b>espi da festa y benedisciun eucaristica</b>	
<i>6:30, 10, 18</i>	<i>s.m. a Al Plan</i>	
<i>ampola:</i>	por chi d'André	
<i>ministronc:</i>	► da doman y domegna: Noemi Erlacher y Lucia Burchia ► da sera y domegna: Alex Pedevilla y Alan Ellecosta	
<i>i recordun:</i>	Germana Lanz Pezzei, Schweiz + 10.04.2014	

**Fá deplü fora dla Carsema – aziun dl'Unité Pastoral Val Badia**




**I m'arjigni ca ala festa de Pasca:**

i mo toli dlaorela da tó pert ala liturgia dl'Edema Santa co porta dal tru dla pasciun ala ligreza dla ressozeziun.

**Fá empara!**



**L'Edema Santa cuntada ai mituns**



**Jöbia Santa:** encö recordunse l'ultima cena de Gejú con sü discepu. Al é n bel momont, plen d'amicizia y de intimité con sü miús amisc. Mo al é ince n momont der dla rialöna y de dolur: Gejú sa che söa pasciun é dampró. Y al é ciamó na cossa co i fej der me: önn de sü compagns le tradesc; y ince i atri amisc s'an sciampa tal momont dla proa y lascia so maester su. Gejú endere ne lasciará mai da ti orei bun, gnanca n momont.

Dertan cösta cena fej Gejú na cossa che degügn ne s'ess aspeté: el, le maester, le plü gran de düc, se fej picio y ti láa i pîsc ai discepu. Al fej cösc por s'ensigné che sc'i orun ester de der' cristiagn messunse se laé i pîsc önn al ater. Cösc ô dí ch'i desson s'orei bun y ester atló önn por l'ater.

Gejú se dá spo cösta sera le comandamont plü emportant y con cösc desson i mostré a düc ch'i sun cristians: “Oresse bun önn al ater, desche iu s'á orü bun. Degügn ne n'á n amur plü gran de chel co dá ca söa vita por sü amisc.” Gejú dij che nos sun sü compagns y ch'al dá ca la vita por nos y por nosta ligreza.

Ennultima se fej Gejú na grandiscima scincunda: l'Eucaristia. Al tól ca le pan y dij “Cösc é mio corp”, spo tólel le vin y dij “Cösc é mio sanch.”

Tal Sacramont dl'Eucaristia sará Gejú entres danter nos. Vigne domegna recordunse cösc gran mister, y porchel s'abinunse tla comunité, plens de ligreza: Gejú, nosc Dio, é pa nos y se deida recordé che al s'ô bun.

**Vendres Sanc:** encö recordunse la mort de Gejú söla crusc. Les parores ch'al á dit dertan l'ultima cena é gnüdes realtà: “Degügn ne n'á n amur plü gran de chel co dá ca söa vita por sü amisc.” Gejú ô ch'i sunse sü amisc y al á orü dé ca la vita por nos. Al á orü sofrí, tal corp y tl'anima, por desmostré che al s'ô bun, tan che nos ti stun a cör y tan emportanc ch'i sun por el.

Pón pa dí de no a tan n gran amur? Ne te vegnel nia enmont ince a te da ti respogne y da dí, con töa vita, che ince tö ti ôs bun y che t'ôs dé ca söa vita por el!?

**Sabeda Santa:** cösc é le de dal chit y dl'aspetanza. Y recordun che Gejú é mort y gnü motü te fossa. I amisc de Gejú s'á mené picé dal corp de Gejú. Ai l'á laé, unt ete con angonc da n bun tof, l'á fat ia te n linzó y motü te n sepolcher ciaé fora tal crep. Encer la fossa de Gejú él gnü jö n gran chit. Tl'aria sonton val' de nö. Mo entant él döt co scuta. I orun vire cösc de tal chit y tl'aspetanza.

→ „La pordica söla munt“ cuntarunse ennant do Pasca